



LBS RAIKAN TAHUN BAHARU CINA, MENGUKIR 65 TAHUN PERTUMBUHAN DAN KOMITMEN KEPADA PEMBANGUNAN KOMUNITI

Petaling Jaya, 05 Februari 2026 – LBS Bina Group Berhad (“LBS” atau “Kumpulan”), pemaju hartanah terkemuka pilihan rakyat, menganjurkan Majlis Makan Tengah Hari Tahun Baharu Cina di Mandarin Oriental, Kuala Lumpur hari ini. Majlis telah diserikan dengan keberangkatan Kebawah Duli Paduka Baginda Sultan Pahang, Al Sultan Abdullah Ri’ayatuddin Al-Mustafa Billah Shah, dan menghimpunkan para tetamu kehormat, rakan perniagaan, wakil media serta warga LBS dalam suasana penuh muhibah, keharmonian dan kemakmuran bersama.

Majlis yang mencerminkan tradisi berterusan LBS dalam memupuk kebersamaan dan penghargaan, diadakan bersempena sambutan Tahun Kuda, yang membawa simbol kekuatan dan ketabahan serta momentum ke hadapan dalam budaya masyarakat Cina. Bagi LBS, Tahun Kuda turut membawa makna yang signifikan sejajar dengan perjalanan pertumbuhan Kumpulan, melambangkan tenaga baharu, kemajuan serta iltizam untuk terus melangkah yakin ke arah aspirasi jangka panjang. Majlis tersebut turut diserikan dengan kehadiran dif-dif kehormat, antaranya termasuk YAB Datuk Amar Haji Fadillah bin Haji Yusof, Timbalan Perdana Menteri dan Menteri Peralihan Tenaga serta Transformasi Air; YB Tan Sri Dato’ (Dr.) Johari bin Abdul, Yang di-Pertua Dewan Rakyat; YB Datuk Seri Haji Mohamad bin Sabu, Menteri Pertanian dan Keterjaminan Makanan Malaysia; YAB Datuk Seri Utama Ab Rauf bin Yusoh, Ketua Menteri Melaka; serta tetamu kehormat yang lain.

Sambutan Tahun Baharu Cina kali ini menandakan satu detik bersejarah buat LBS, bersempena ulang tahun ke-65 penubuhan syarikat, iaitu enam setengah dekad sejak tahun 1961. Diasaskan oleh mendiang Dato’ Sri Lim Bock Seng, LBS telah berkembang pesat dan kini muncul sebagai salah sebuah pemaju hartanah terkemuka di Malaysia.

Kira-kira 600 tetamu telah menghadiri majlis tersebut dan dihiburkan dengan persembahan muzik tradisional Cina yang mencerminkan keharmonian semangat masyarakat berbilang

kaum di negara ini, di samping berpeluang beramah mesra bersama dalam suasana yang meriah dan penuh santun.

Pada majlis yang penuh makna ini, LBS secara rasminya mengumumkan pembaharuan janji jenamanya, “Building Tomorrow Together”, yang mencerminkan visi masa hadapan Kumpulan, komitmennya dalam membangunkan komuniti yang lestari dan berkembang, serta dedikasi berterusan untuk menyampaikan nilai berkekalan kepada generasi akan datang.

Sejak berdekad lamanya, LBS telah memainkan peranan penting dalam membentuk kediaman, bandar dan komuniti di seluruh Malaysia. Falsafah Kumpulan kekal berteraskan kepercayaan bahawa pembangunan mengutamakan kesejahteraan insan berbanding produk semata-mata, pertumbuhan harus dikongsi secara inklusif, mampan dan berlandaskan tujuan, serta masa hadapan kukuh dibina melalui kerjasama erat bersama komuniti, pihak berkepentingan dan negara.

Mengulas mengenai majlis tersebut, Tan Sri’ Dato’ Sri Ir. (Dr.) Lim Hock San berkata, “Memandang ke hadapan, LBS melihat tahun 2026 sebagai satu penanda aras, dengan perancangan untuk melancarkan 10 projek baharu di sekitar Lembah Klang, Johor dan Pahang. Inisiatif-inisiatif ini mencerminkan iltizam berterusan kami untuk menyampaikan pembangunan yang mampu milik dan mampan, selaras dengan keperluan yang semakin berkembang dalam kalangan Keluarga Malaysia, di samping menyokong aspirasi pembentukan masyarakat MADANI yang harmoni.”

Beliau turut merakamkan setinggi-tinggi penghargaan kepada seluruh warga LBS, di samping mengiktiraf dedikasi serta komitmen tidak berbelah bahagi mereka sebagai pemangkin utama kepada kejayaan berterusan Kumpulan.

-Tamat-